



21. august 2009

UKA 2009/63

Inatsisartut suleriaasianni § 32 naapertorlugu aalajangiiffigisassatut siunnersuut imattoq matumuuna saqqummiupparput:

Nunatsinni isumaginninnikkut ajornartorsiuteqartut pillugit siunnersuisoqatigiinnik pilersitsisoqarnissaa pillugu Naalakkersuisut sulissuteqaqqullugit Inatsisartut aalajangernissaannik siunnersuut.

(ATASSUT-ip Inatsisartuni ilaasortaatitai: Finn Karlsen, Siverth K. Heilmann, Knud Kristiansen)

Tunngavilersuut:

Inatsisartut 2005-mi ukiakkut ataatsimiineranni ATASSUT-mit siunnersuutigivarput Nunatsinni isumaginninnikkut ajornartorsiuteqartut pillugit siunnersuisoqatigiinnik pilersitsisoqassasoq, taamanikkulli siunnersuuterput ilalerneqanngilaq, Naalakkersuisut siunnersuisoqatigiimmik taamaattumik pilersitsinissaq pilersaarutigereernerarmassuk pissutaatinneqarluni.

Ullumikkut killifitsinni pingaartumik meeqqat inuuusuttullu qanoq atugaqartitaanerat pillugu annertuumik eqqumaffiginnittooqarlunilu sulissuteqarneq ATASSUT-mit toqqisisimanartuutillugulu iluarismaalaruarlutigu pingaartipparput innuttaasut isumaginninnikkut ajornartorsiuteqartut tamarmik qaffasissumik pitsaassusilimmik sullinneqarnissaat qulakkiissallugu.

ATASSUT-millu naliliinerput malillugu innuttaasut isumaginninnikkut ajornartorsiuteqartut tamarmik ataatsimoortumik sullinneqarnerat pitsangorsarneqartariaqartoq, taamaammallu siunnersuisoqatigiimmik tamatigoortumik taamaattumik pilersitsisoqartariaqartoq, taamaammat siunnersuut manna matumuuna saqqummiuteqqipparput.

Piviusuovoq Kalaallit Nunatsinni ullumikkut innuttaasut amerlasuut assigiinngitsunik pissutilimmik isumaginninnikkut ajornartorsiortuunerat. Taamatuttaaq piviusuovoq isumaginninnikkut ajornartorsiuteqartut atugarisaat pillugit pisortat tungaannit ilisimasat killeqartorujussuummata.

Nunatsinni inuaqatigiit isumaginninnikkut sillimmartaarnerat annertunerpaaffimmiissappat, taamaalillunilu innuttaasut toqqisisimanartumik inuuneqartinneqarnerat pitsaanerpaaajussappat, pisariaqarpoq isumaginninnikkut ajornartorsiutillit ikilisarneqarnissaat pillugit pisortat iliuusaat pillugit annertuumik nakkutiginnitooqarnissaa.

Isumaginninnikkut ajornartorsiuteqartut pillugit ilisimasat killeqarnerisa kingunerisaanik, taamaalillunilu iliutsit killeqarnerisa kingunerisaannik ilaqtariit tunngaviusumik inuuneqarnissaannik angajoqqaat amerlavallaat sulissutiginninnerminnik unitsiinnartarput aammalu unitsiinnarnissaminut navianartorsiortuupput.

Ilaqtariit amerlavallaat ilaqtariittut inuunissaraluat neriuutarunnerup kingunerisaanik sequminneqartarpoq aammalu ilaqtariit amerlavallaat siunissamik qaamasumik neriuutarullutik



upperinnigunnaartarput. Tamatumia kingunerisaanik meeqqat amerlavallaat angerlarsimaffimminkit qimagutitaasarpot qimagutitaanissaminnullu aarlerinartorsiorput.

Innuttaasut qanorluunniit ittunik ajornartorsiuteqartut ikiorneqarsinnaanerminnik ilisimaarinninnissaminnut toqqissillutik tunngavissaqartariaqarput. Innuttaasut isumaginninnikkut ajornartorsiuteqartut ilaqtariittut inuunerup aammalumi inuunerup siunertaqassusianik takunnissinnaalernissaminnut sakkussaqarnermik ilisimaarinnilernerannik alloriarneq aalajangiisuussumik isumalerujussuusinnaavoq.

Innuttaasup kialuunniit pisinnaatitaaffigaa inuttut ataasiakkaatut ilaqtariittullu inuiaqatigiit isumaginninnikkut isumannaatsumik ingerlatitaaneratigut tamakkiisumik ikiorseneqarsinnaanissaq. ATASSUT-mit isumaqpugut isumaginninnikkut isumannaatsumik atugassaqartitsinissamut aqquatisat aalajangiisuusut ilagilluinnaraat innuttaasut sanngiinnerusut isumaginninnikkullu ajornartorsiuteqartut sinnerlugit oqalussinnaasoqarnera.

Taamaammat siunnersuutigaarput innuttaasut isumaginninnikkut ajornartorsiuteqartut pillugit siunnersuisooqatigiimmik Kalaallit Nunatsinni pilersitsisoqassasoq. Takorloorparput siunnersuisooqatigiit suliassai pingaarerit tassaassasut inuiaqatigiit sanngiinnerusortaminut iliuuserisaat pillugit malinnaaffiginninnissaq, inuiaqatigiinni sanngiinnerusortanut pitsangorsaalluni iliuusissanik siunnersuuteqartarnissaq, innuttaasut ataatsimut inuiaqatigiinni sanngiinnerusortaasunut annertunerusumik sulliseqatalersinniarneqarnissaannut kaammattuisuunissaq kiisalu inuiaqatigiinni sanngiinnerusortaasut atugarisaat pillugit killiffimmik siunnersuisooqatigiit ukiut tamaasa nalunaarusiortassasut.

Siunnersuisooqatigiinnik pilersitsisoqarneratigut ingerlasoqalerneratigullu aningaasartutissat matussuserneqarnissaat aningaasaliissutaareersuit iluini nikisiterinikkut pisinnaasoq ATASSUT-mit naatsorsuutigaarput.